



ZIIT

Wiä schnäll doch numä d'Ziit verstricht
nu d'Ewigkeit duuräd lang vor allem am Änd

Ziit isch Fründ aber Ziit isch a Feind
will si Frünschaftä teilt, aber a vereint
i schlächtä Momänt muss nu Ziit vergah
denn Ziit heilt Wundä und dä Schmerz laht na

Ziit lauft wiiter unufhaltsam
mä chan si nid stoppä au nid g'waltsam
verloreni Ziit holt mä leider nie meh i
denn Ziit isch Ziit...

Und si bliibt au immer gliich
obwohl si subjektiv nid immer gliich erschiint
mal isch ä Sekundä än Ewigkeit
dänn sind wieder Stundä im Nuu verrest

Leider ebä äbä Fluäch wiä au Sägä
i glaub mä muäs sich däm füägä und eifach dämit läbä
mä chan nid eifach wartä bis Ziit sich wandlät
sondern muss apackä und ziitig handlä

Will mä numä Ziit hät, wämä si sich nimmt...
Vergängäs liit scho wiit wäg, und i luägä nid zruigg... so wi Chind
machi immer numä na s'Bescht usäm Tag, läbä intensiv im Jetzt und Da
und laht mi überraschä was hät d'Ziit na für mich parat

*Hüt wartich uf dich, wart dass d'Sekundä vergönd
Mer seit, Ziit seg für ali gliich
Scho morn bisch du da, doch churz druf muäsch wieder gah
Egal wivill Ziit dätzwüschä liit*

*Ä Minutä schiint eimal wiänä Ewigkeit
Und doch isch sicher, dass si verstriicht
Villi Stundä verflüüged schnell in Zweisamkeit
Lueg wi dä Mond dä Sunä wiicht*

I nimä mir Ziit für mich und au Ziit für dich
denn mir alli nämäd üs viel zwenig Ziit
für das was wükli wichtig isch
öb das richtig isch?

Denn Ziit wo mir üs nämäd isch doch Ziit wo üs öpis git
und im Ändeffekt isch Ziit
alles was üs bliibt
üses koschtbarschte Guät dämit handlä chamä nid

Somit simmer ziiitlich bemässä alli arm oder ebä alli riich
denn da eusäs Dasii ja leider beschränkt isch
drum jedi gnutzt Sekundä im Läbä äs Gschänk isch
jedi ungnutzt nur ä puuri Verschwändig

Drum stahni jetzä uuf, machä s'Bestä druus
ballä fescht ä Fuuscht zum mim letschtä Schwuur
mir immer sälber treu z'bliibä, mini Scheu z'bindä
a mim gsamtä Läbä Freud z'findä

Kei Chancänä meh uuslah
will idä Ziit, chamä nunämal nid zrugg gah
drum läbi intensiv, numä na im Jetz und Da
und lah mi überraschä, was hät Ziit na für mich parat

*Hüt wartich uf dich, wart dass d'Sekundä vergönd
Mer seit, Ziit seg für ali gliich
Scho morn bisch du da, doch churz druf muäsch wieder gah
Egal wivill Ziit dätzwüschä liit*

*Ä Minutä schiint eimal wiänä Ewigkeit
Und doch isch sicher, dass si verstriicht
Villi Stundä verflüüged schnell in Zweisamkeit
Lueg wi dä Mond dä Sunä wiicht*